



DR. SC. OMER HAMZIĆ

Listovi gračaničkog kalendara od 01.05.2008. - 30.10.2008.

9. 5. 2008.

Otkriveno obnovljeno partizansko spomen-obilježje u Malešićima

Spomen-kosturnica je podignuta 1959. godine i pošto je, vremenom bila potpuno zapuštena, u Općinskom odboru SUBNOAR-a odlučili su da je obnove uz pomoć mještana i Mjesne zajednice Malešići. U kosturnici su sahranjeni posmrtni ostaci 8, poginulih partizanima, od kojih se jedino zna za ime Vulović Milinka – Miše i Ilić Jovanke. Nikada nije pouzdano utvrđeno iz kojih su partizanskih jedinica posmrtni ostaci tih boraca. Vjerovatno se radi o borcima iz jedne ili više brigada 25. i 45. srpske divizije JA, koje su 11. i 12. marta 1945. vodile borbe sjeverozapadno od Gračanice ili o partizanskim jedinicama, koje su poslije ulaska u Gračanicu, 7. aprila 1945. godine nastavile gonjenje neprijatelja u pravcu Malešića, prema Lukavici i dalje prema Doboju.

18. 5. 2008.

11. festival dječjeg teatra BiH u

Gračanici: u konkurenciji bilo 11 predstava iz devet BiH gradova.

Tokom posljednjeg vikenda Gračanica je po jedanaesti put bila domaćin 11. po redu festivalu dječjeg teatra, na kojem je nastupilo 11 teatarskih grupa iz devet bosanskohercegovačkih gradova. Festival su zajedno organizovali BKC Gračanica i KUD "Adem Alić" Gračanica. Na Festivalu je nastupilo oko 150 malih glumaca iz oba BiH entiteta. Svi su bili jednodušni u ocjeni da je u prvom planu bilo druženje i sklapanje novih poznanstava, a tek onda radost teatarske igre. Nagrade ocjenjivačkog žirija (u sastavu Ljubica Ostojić, Larisa Softić-Gasal i Armin Hadžimustafić) dobile su sljedeće amaterske grupe: Amatersko pozorište "Neretva" Konjic, voditeljski tandem Sarah Alibegović i Semir Herić, za uspješan debi, Dječji studio glume "Roda" Banja Luka, predstava "Veseli četvrtak", za radost igre, Dječje pozorište "Eko Art" Bugojno, predstava "Ljepotica i zvijer", za teatarsku edukaciju kroz sve elemente

predstave, Dječji studio Mostarskog teatra mladih, predstava "eMTeeM-ov omnibus", za uspješno njegovanje eMTeeM-ovske teatarske poetike, OŠ "2. osnovna škola" i KUD "Adem Alić" Gračanica, predstava "Bajka od dva LJ", za kolektivnu igru.

18. 5. 2008.

Donja Lohinja: Otkriveno šehidsko spomen obilježje, simbolično predati na upotrebu asfaltirani putevi i igralište za male sportove

Tim povodom u Donjoj Lohinji organizovana je skromna svečanost na kojoj je govorio Općinski načelnik Nusret Helić. Radi se o blizu hiljadu metara asfaltiranih puteva kroz mjesnu zajednicu i igralištu za male sportove u blizini osnovne škole, koji su građeni sredstvima iz Budžeta općine i prikupljenim sredstvima građana.

25. 5. 2008.

Otkriveno spomen obilježje na Zečevom Gaju u blizini Stjepan Polja

Na spomeniku su ispisana imena desetorice hrabrih momaka koji su u blizini te kote izginuli 25. 5. 1992. godine u jurišu na dobro utvrđene položaje srpske paravojske u širem rejonu Lendića i Zečeva Gaja. Cilj je bio da se likvidiraju položaji,

sa kojih su Srbi zasipali granatama i ugrožavali Stjepan Polje, Malešiće i Gračanicu. Napad nije uspio zbog nepripremljenosti akcije, slabe procjene snaga i neiskustva momaka koji su u njemu učestvovali. Tragedija na Zečevom gaju, iako je u početku bolno odjeknula u Gračanici, bila je snažan podsticaj za objedinjavanje svih snaga odbrane i zbijanje redova oko vojno-političkog rukovodstva općine.

29. 5. 2008.

39. sjednica Općinskog vijeća Gračanica: nema rješenja za lokaciju stočnog groblja

Najviše rasprave na ovoj sjednici izazvala je Odluka o određivanju lokacije za stočnu jamu-grobnicu, kojom je za te namjene predložena Gradska deponija na Grabovcu. U ime Kluba vijećnika SDA, vijećnik Galib Avdić predložio je da se stočna jama-grobnica izgradi na lokalitetu „Šemunica“, a Senad Memić ispred Kluba vijećnika SDP-a podržao je prijedlog da to ipak bude Gradska deponija na Grabovcu. Bilo je prijedloga da se obadvije lokacije iskoriste za izgradnju stočnih jama-grobnica, a na kraju je zaključeno da Odluka u formi Nacrta ide na javnu raspravu u narednih 30 dana, kako bi i građani mogli iznijeti svoj stav o ovom problemu, što je od strane vijećnika bilo svojevrsno „guranje glave u pijesak“ i bacanje vrućeg krompira u ruke građanima, koji su ih valjda i izabrali da rješavaju njihove probleme.

Na ovoj sjednici Vijeće je usvojilo Odluku o izmjeni Odluke o građevinskom zemljištu, te prihvatilo Izvještaj o radu Općinskog pravobranilaštva, Izvještaj o otvaranju Narodne kuhinje u Gračanici, Informaciju o ulaganjima u infrastrukturu u 2007. godini na području općine Gračanica i Informaciju o stanju putne mreže, te nekoliko rješenja imovinsko-pravne službe.



1. 6. 2008.

Tematska izložba i Katalog „Svi naši načelnici – čelni ljudi lokalne uprave u Gračanici od 1868. do 2008. godine“

Izložbu je postavio autorski tim u sastavu: prof. Osman Puškar, mr. Omer Hamzić, prof. Edin Šaković i prof. Rusmir Djeđević, a koordinator projekta bio je Izudin Duraković, direktor BKC-a Gračanica. Uz prigodan prateći program i multimedijalnu prezentaciju, izložba je bila glavna kulturna manifestacija u povodu obilježavanja Dana općine. Izložba dosta pregledno, informativno i historijski utemeljeno, prikazuje nosioce lokalne vlasti u Gračanici od uspostavljanja osnovnih institucija lokalne samouprave krajem osmanske uprave (institucije gradskih općina – beledija, gradskih vijeća, kaza – kotara i kajmakama – kotarskih predstojnika) do današnjih dana. Posredno, to predstavlja svjedočanstvo o dugoj tradiciji urbanog života u Gračanici, te o povijesnoj ulozi Gračanice kao administrativnog i urbanog centra šire regije. Uz izložbu je štampana i publikacija – katalog, koja će biti izvor dragocjenih podataka iz lokalne historije, poticaj i temelj za neka buduća istraživanja. Izložba je pobudila veliko interesovanje Gračanlija i drugih posjetilaca koji su tokom juna boravili u Gračanici.

2. 6 2008.

„Dani Gračanice“ – bogatstvo sadržaja

Period od 25. maja, Dana odbrane i 2. juna Dana Općine Gračanica (kao dva od četiri datuma iz kalendara značajnih datuma koji se obilježavaju na nivou općine) već po tradiciji rezervisan je za svečano otvaranje ili puštanje u rad novoizgrađenih objekata i ispunjen različitim kulturnim, sportskim i drugim društvenim i vjerskim sadržajima. I ove godine prezentirana su kulturna i sportska dostignuća

gračaničkih osnovnih i srednjih škola, a od novoizgrađenih objekata, 20. maja otvoren je sportski poligon na Malti (Gračanica), 23. maja predate na upotrebu asfaltirane ulice na Ritašićima i Baščama, 25. maja otkriveno spomen-obilježja na Zečevom Gaju, 31. maja predati na upotrebu vodovod i ulična rasvjeta u naselju Bahići. Od kulturnih sadržaja, vrijedi spomenuti promociju knjige „Moja zona odgovornosti“, autora Senahida Kahrimanovića, koja je obavljena 31. maja u Stjepan Polju i Tematsku izložbu „Svi naši načelnici“, koja je otvorena 1. juna u BKC u Gračanici. Spomenimo i veliki muzički spektakl u centru Gračanice i veličanstveni vatromet, koje se priređuje tradicionalno svake godine uoči dana Općine, 2. juna.

2. 6. 2008.

Dan općine, svečana akademija, dodijeljena općinska priznanja

Uz bogat kulturno-umjetnički program, prigodan referat i u prisustvu brojnih gostiju, dodijeljena su tradicionalna općinska priznanja. Zlatne plakete dobile su sljedeće firme i organizacije: Kompanija „Širbegović“ Gračanica, „Shell elektron d.o.o.“ Miričina i Nogometni klub „Mladost“ Malešići; Zlatna značke dodjeljuje su sljedećim pojedincima: Ramizu Grapkiću iz Stjepan Polja, Muratu Hurtiću iz Gračanice, Čamilu Huskanoviću iz Gračanice, Nihadi Nuhanović iz Pribave, Almedini Štilić iz Miričine, Lejli Žunić iz Gračanice.

2. 6 2008.

Bilans uspjeha općinske vlasti za 2.007.: u infrastrukturu uloženo preko 5 miliona KM, kapitalna ulaganja u infrastrukturu veća za 65,89 %, u komunalnu infrastrukturu uloženo 5.246.924 KM, a u ostalu infrastrukturu (sport, kultura i ostalo) 454.867 KM

Rekonstruisana je i asfaltirana gotovo kompletna lokalna putna mreža, a učinjeni su i veliki zahvati na saniranju vodovodne mreže, javne rasvjete i sl. U **putnu infrastrukturu**, u 2007. godini uloženo je ukupno 4.065.755 KM, uključujući i ulaganja u putnu infrastrukturu iz zaduženja kod dobavljača i to u iznosu od 2.211.271 KM, što je u odnosu na ukupna ulaganja u putnu infrastrukturu u 2006. godini više za 73,32 %.

Ulaganja u putnu infrastrukturu, bez zaduženja, odnose na sljedeće putne pravce: Doborovci – Monj–Džakule (172.431 KM); u Vranovićima, dio putnog pravca Bukva – Karići (134.646 KM); u Stjepan Polju, dio putnog pravca Džebe – Avdići – Polje (123.098 KM); u Gornjoj Orahovici, dio putnog pravca Džafići – Mehići (113.734 KM), dok je za rekonstrukciju i asfaltiranje ulica na području grada, odnosno MZ Gračanica utrošeno ukupno 349.675 KM.

Kada je u pitanju **vodosnabdijevanje**, odnosno rekonstrukcija vodovodne mreže, u 2007. godini u ove svrhe je uloženo 478.699 KM, što je više za 71,09 % u odnosu na 2006. godinu. U vodosnabdijevanje je uloženo 404 038 KM, a u izgradnju i rekonstrukciju kanalizacije 74 661 KM. U rekonstrukciju i izgradnju **javne rasvjete** u prošloj godini je uloženo ukupno 199.370 KM, što je u odnosu na 2006. godinu više za 114,29 % . U izgradnju javne rasvjete u gradu uloženo je 64.629 KM, a u mjesnim zajednicama 63.032 KM. U **ostale infrastrukturne projekte** uloženo je ukupno 503.100 KM, a to se odnosi na izgradnju parking prostora i javnih autobuskih stajališta (19.443 KM), izgradnju mostova (10.000 KM), horizontalnu i vertikalnu signalizaciju (24.270 KM), uređenje poljoprivrednog zemljišta (86.541 KM), re-

gulaciju korita Sokoluše (15.210 KM), toplifikacija Gračanice (347.063 KM), sanacija rijeke u Lukavica (600 KM) itd.

Ukupna **ulaganja u sport i kulturu** u prošloj godini iznosila su 454.867 KM, što je u odnosu na 2006. godinu više za 176,22 %. Infrastrukturna ulaganja u sport u prošloj godini iznosila su 280.492 KM, što je više za 115,19 % u odnosu na 2006. godinu, a u kulturu 174.375 KM.

Iz pregleda ulaganja u komunalne infrastrukturne projekte može se zaključiti da su putevi, odnosno lokalna putna mreža imali prioritet, dok je vodosnabdijevanje bilo u drugom planu. Kako se stanje u vodosnabdijevanju pogoršava i nameće kao sve veći problem, za očekivati je da mjesne zajednice i strukture vlasti u narednom periodu znatno veća sredstva usmjere u tu oblast. (Printtel br. 26)

5. 6. 2008.

„Gračaničko keranje“ u Zagrebu, delegacija općine posjetila Zagrebačku džamiju, a potom razgovarala sa atašekom za kulturu Ambasade BiH

U Kulturnom centru ambasade Bosne i Hercegovine u Zagrebu otvorena je Izložba pod nazivom „Čipka-kera, neprolazna ljepota“, koju su zajednički organizovali Udruženje žena „Gračaničko keranje“, Asocijacija za interkulturalne aktivnosti i spašavanje naslijeđa Bosne i Hercegovine (ASASN) i Soroptimist international–SI club iz Sarajeva. Postavku izložbe izvršila je Azra Bačević-Šarenkapa, koja je na otvaranju izložbe prisutne pobliže upoznala sa neprolaznom ljepotom čipke – kere, kao autohtonim proizvodom kućne radinosti koja se održala u Gračanici i u još nekoliko gradova Bosne i Hercegovine. Ovo je prvo predstavljanje udruženja „Gračaničko keranje“ u inostranstvu, jedinstvenog udruženja u Bosni i Hercegovini, koje upravo

ima zadatak da afirmiše taj jedinstven proizvod ženskih ruku.

Otvaranju izložbe prisustvovao je veliki broj Zagrepčana koji nisu krili svoje divljenje razgledajući mala remek-djela vrijednih ruku gračaničkih žena.

U kulturno-umjetničkom dijelu programa učestvovao je interpretator narodne muzike Ibrahim Jukan, čija je firma počastila posjetioce bosanskim kolačima iz svog „slatkog“ programa.

U okviru ove posjete delegacija općine Gračanica, na čelu sa općinskim načelnikom Nusretom Helićem i magistrom Omerom Hamzićem, posjetila je i zagrebačku Džamiju i Islamski centar, gdje je sa predsjednikom Islamske zajednice grada Zagreba gosp. Mirsadom Srebrenikovićem dogovorena daljnja saradnja i predstavljanje kulturno-historijske baštine općine Gračanica u Zagrebu. Delegacija je razgovarala i sa Minkom Ljubijankić, atašecom za kulturu pri ambasadi BiH u Zagrebu i takođe dogovorila nastavak saradnje i razmjenu kulturnih sadržaja.

21. 6. 2008.

Gračanica: asfaltirana ulica Derva

U prisustvu velikog broja građana i predstavnika općine Gračanica i Mjesne zajednice Gračanica u naselju Drafnići je na upotrebu predata ulica Derva. Asfaltirana dionica duga je 420 metara, a ukupna investicija iznosi 50 000 KM, od čega su 20 000 obezbijedili građani, 30 000 KM općina Gračanica.

30. 6. 2008.

40. sjednica Općinskog vijeća: nije prošao zahtjev „JP „Komus“ za povećanje cijena odvoza smeća za 40%

Taj je zahtjev izazvao je dosta polemične rasprave na ovoj sjednici Vijeća. Direktor JP „Komus“ Nedžad Sulejmanović ovaj zahtjev pokušao je argumentirati či-

njenicom da već osam godina nisu povećavane cijene odvoza smeća, a da ih je sada na to primoralo divljanje cijena, naročito nafte i naftnih derivata. Nakon polemične rasprave zahtjev „Komusa“ ipak je odbijen. U nastavku rada jednoglasno je usvojena Deklaracija o proglašenju nevažnim odlikovanja i priznanja koja je dodijelio optuženik za ratne zločine Radovan Karadžić, a potom je uslijedila rasprava o Informaciji o toku realizacije projekata izgradnje putne infrastrukture iz zaduženja općine. Vijećnik Muharem Musić je izrazio zadovoljstvo što smo, po njegovim riječima, zaboravili kako izgleda makadamska putna podloga ali i zabrinutost što je oko 4,5 miliona maraka potrošeno bez sveobuhvatne projektne dokumentacije i što se nije u svim MZ ispoštovala odluka o visini učešća građana. Najviše vremena vijećnici su potrošili raspravljajući o Informaciji o snabdijevanju građana pitkom vodom i higijenskoj ispravnosti vode i vodoopskrbnih objekata na općini Gračanica. Nažalost, bez konkretnih prijedloga i rješenja. (Printtel br. 30)

25. 6. 2008.

Otvorena narodna kuhinja u Gračanici

Konkretna aktivnost na otvaranju narodne kuhinje započeo je gračanički Merhamet na čelu sa predsjednikom Ibrahimom Šerbečićem prije nepune tri godine. Općinsko vijeće, općinski načelnik, udruženja građana i velika većina gračaničkih poduzetnika podržali su ovu ideju i nakon što su pronađene prostorije u bivšoj upravnoj zgradi Preduzeća za prevoz putnika „AVIS“, prišlo se njihovom renoviranju i adaptiranju za potrebe Narodne kuhinje. Na skromnoj svečanosti, povodom otvaranja ove humanitarne ustanove Općinski načelnik Nusret helić, između ostalog rekao je i ovo: „Ja evo ovdje, na ovom mjestu,

obećavam da ćemo učiniti sve što je u našoj moći, da ova kuhinja bude na usluzi onima kojima je potrebna ali isto tako učiniti ćemo sve da bude što manje onih zbog kojih je ova kuhinja i otvorena." U prvoj fazi hrana za potrebe Narodne kuhinje Gračanici (za početak oko 200 obroka) spremat će se u Narodnoj kuhinji "Imaret" u Tuzli i odatle prevoziti u Gračanicu, a kada se za to steknu uslovi spremanje hrane obavljat će se i u Narodnoj kuhinji u Gračanicu.

31. 7. 2008.

41. sjednica Općinskog vijeća: Vijećnici pokušali naći odgovore na sljedeća pitanja: Šta je općina uradila i šta može uraditi za penzionere, mogu li biti bolje komunalne javne službe, dokle će građani ruralnih dijelova općine piti zagađenu vodu

U vezi sa penzionerima, zaključeno je da se povećaju sredstva iz općinskog budžeta za rad Udruženja penzionera, upućen zahtjev Poreskoj upravi da se više angažuje na naplati doprinosa za zdravstveno i penzion osiguranje, te da redovno dostavlja spisak privrednih subjekata koji godinu dana i duže ne plaćaju ove doprinose. Što se tiče komunalnih službi („Komus“ i „Vodovod i kanalizacija“), data im je prolazna ocjena za radu u prošloj godini, a što se tiče zagađenosti seoskih vodovoda, zaključeno je da se uradi program po kojem će JP „Vodovod i kanalizacija“, postepeno preuzimati na upravljanje i održavanje sve vodoopskrbne objekte na općini. Šta će biti od toga ostaje da se sačeka i vidi. Na ovoj sjednici vijećnici dali suglasnost za gradnju i proširenje objekta Doma zdravlja u Gračanicu i bez veće rasprave usvojili Informaciju o stepenu zagađenosti zraka i vodotoka na području općine Gračanica, Informaciju o primjeni Zakona o uslovima i postupku legalizacije bespravno izgrađenih objekata

na području općine Gračanica i nekoliko rješenja i zaključaka iz domena imovinske-pravne službe. (Print-tel br. 33)

13. 7. 2008.

Proklanjanje Šarene (Mejdan džedid) džamije u Gračanicu okupilo oko 20 hiljada vjernika: Reis-ul-ulema u BiH Mustafa ef. Cerić, čestitajući svima koji su dali doprinos u gradnji ove velelijepne džamije, odao priznanje općinskom načelniku Nusretu Heliću za stvaranje ozračja zajedništva i tolerancije na općini Gračanica.

Zbog naraslih potreba i nefunkcionalnosti postojeće zgrade, Mejdan džedid, u narodu poznatija kao Šarena džamija srušena je u januaru 1990. godine i istovremeno otpočela izgradnja jedne veće i kompleksne građevine, sa više funkcija. Prije toga formiran je odbor za izgradnju nove džamije, na čije čelo je izabran Vehid ef. Delić, koji je rukovodio gradnjom sve do završetka objekta. Kako piše Edin Šaković (<http://info.gracanica.net>), tokom zemljanih radova, nakon rušenja džamije, vidjelo se da je kulturni sloj oko džamije debeo približno jedan metar, a u gornjem (zapadnom) dijelu greblja (harema), na dubini od 80 cm iznad zdravice, jasno su se raspoznavali tragovi paljenja kreča. Tu se našlo i više komada keramike koja je bila crne boje, sa uočljivim zrcima kvarcnog pijeska. U temeljima srušene džamije je bilo i dvadesetak lijepo tesanih kamenova, uglavnom od pješčara, a manje od sedre, karakterističnog lučnog oblika unutrašnjih i spoljnih ploha (u nekih su između njih bile probušene rupe). Na jednom ovčjem kamenu je bilo nekoliko usjeka u obliku luka sličnih urezima u luku iznad nekih starih kamenih vrata ili prozora. Prema izgledu tih kamenova, moglo se zaključiti da su poticali iz neke građevine kružnog ili



lučnog oblika. U temelje stare zgrade džamije ugrađeni su 1932/3. godine i sigurno potiču iz neke starije i značajne građevine. Ovo zadnje rušenje i građenje Mejdana džemid džamije je četvrto ili peto u njenoj višestoljetnoj povijesti. Prva izgradnja je možda bila u 16. stoljeću, druga u prvoj polovini 18. stoljeća, treća negdje između sedmog i zadnjeg decenija 18. stoljeća, četvrta 1932. i 1933. godine, a peta (zadnja) 1990. godine. Poslovima rušenja stare i izgradnjom nove džamije rukovodio je Građevinski odbor od tridesetak članova, koji je formiran novembra 1989. godine. Gradnja ovog složenog vjersko-kulturnog

objekta (vjerovatno jedinstvenog objekta u BiH) započela je u proljeće 1990. godine. Najveći dio grubih građevinskih radova urađen je do početka rata 1992. godine. Kroz čitav rat gasulhana je bila u funkciji (jedina u gradu). Takođe je suteran prostor za namaz bio u funkciji isturenog punkta Osnovne škole i kao džamija. Tokom rata zgrada je pretrpjela nekoliko pogodaka granata. Šarena džamija gradila se po fazama od 1990. godine, da bi danas dobila izgled koji izaziva ponos u duši svakog Gračanlije. Na velikom prostoru u dva nivoa zastupljeni su sljedeći sadržaji: džamija, učionice, abdesthana, restoran, divanhana, biblioteka, prodavnica, gasulhana, mesara itd. Površina prostora za namaz iznosi 205,74 kvadratna metra, a u njegovom suteranu je ista takva površina za druge potrebe. Do vrha kupole je 17,65 metara, a unutrašnji prečnik je 11,35 metara. Munara je visoka 36 metara-plus alem. (<http://info.gracanica.net>)

O samoj svečanosti otvaranja džamije, opširno su izvijestili kako lokalni tako i federalni i kantonalni mediji. Posebnu pažnju izazvalo je istupanje Reis-ul-uleme Mustafe ef. Cerića i javna pohvala koju je uputio Općinskom načelniku Nusretu Heliću. Prvo je imam Šarene džamije, Fadil ef. Karić pozdravio sve prisutne, a potom je Abdulh ef. Hodžić proučio ašare. Prisutnima je dobrodošlicu poželio i Abdulaziz Ametbegović, predsjednik Medžlisa IZ Gračanica, te glavni imam Medžlisa IZ Gračanica Smajo ef. Mustafić i predsjednik Građevinskog odbora Vehid ef. Delić. Potom se vjernicima i gostima obratio općinski načelnik Nusret Helić: „Prvo čestitam džematlijama, građanima Gračanice i Građevinskom odboru i svima onima koji su pomogli da se izgradi, bolje rečeno obnovi ova džamija, koja je

već odavno dio historije gračaničke čaršije. Volio bih da kao muslimani, Bošnjaci, kao ljudi koji vjeruju u Boga i Božje poslanje budemo jedinstveni i u svim drugim poslovima koji su od zajedničkog interesa i od općeg značaja za našu zajednicu.“

Reis – ul – ulema Islamske zajednice Bosne i Hercegovine Mustafa ef. Cerić je u svom obraćanju posebno istakao: „Ja se nadam da će Gračanlije ovdje kao dobri domaćini, a ono što sam danas čuo od gradonačelnika Gračanice me jako obradovalo. Ovako govori domaćin u svom gradu. I želim da mu čestitam. Tako treba domaćin u svom gradu da nam da poruku da smo mi jedna zajednica posebno u ovom sadašnjem vremenu, u kojem treba da vidimo što je naš zajednički interes. I da prema tom zajedničkom interesu svako radi na svoj način.“

Treba reći da su se sve nadležne općinske službe, javna preduzeća i ustanove, posebno „Komus“, te Policijska stanica Gračanica, Teritorijalna vatrogasna jedinica i ostale službe maksimalno uključile u organizaciju ovog vjerskog skupa, kako u njegovoj pripremi, tako i za vrijeme njegovog trajanja, pa i neposredno poslije tog, za Gračanicu, velikog događaja. Svima njima, s razlogom, dan kasnije, javno se zahvalio načelnik Općine Nusret Helić, a posebnu čestitku i riječi zahvalnosti uputio je svim Gračanlijama, koji su uoči i na dan proklanjavanja džamije „otvorili dušu, avlije, kuće, trpeze i sa osmjehom dočekivali i ugostili naše drage musafire iz svih krajeva zemlje i šire.“

22. 8. 2008.

Malešići : Otvorena ambulanta porodične medicine: ukupna investicija oko 200 hiljada KM, Mjesna zajednica obezbijedila oko 60 hiljada KM za zidanje objekta i postavljanje stolarije

Mještani Malešića dobili su oko 200 kvadratnih metara savremeno opremljenog ambulantnog prostora, predviđenog za rad dva tima porodične medicine. S obzirom na trenutni broj registrovanih korisnika zdravstvene zaštite, u toj ambulanti za sada će raditi jedan tim, a kada se steknu uslovi biće angažovan i drugi.

29. 8. 2008.

Gračanica: Matični ured ima pune ruke posla: svake subote desetak vjenčanja

Samo u julu ove godine u gračaničkoj „šarenoj kući“ sklopljeno je 40 brakova, što je skoro duplo više nego u istom periodu prošle godine. Isti trend nastavio se i u avgustu, a razloge dijelom treba tražiti i u vjerovanju Bošnjaka da se „nije lijepo vjenčavati između dva bajrama“, pa su mladi požurili da to obave prije početka Ramazana.

U julu mjesecu 2008. godine ovaj matični ured je izdao ukupno 2.512 različitih uvjerenja i izvoda, od čega 1.597 izvoda iz matične knjige rođenih, 247 izvoda iz matične knjige vjenčanih, 71 izvod iz matične knjige umrlih i 597 uvjerenja o državljanstvu. U ovom mjesecu umrlo je 14 stanovnika Gračanice.

Ako se ima u vidu da u pomenutom Uredu rade dva službenika, onda se može reći da imaju u posljednjih nekoliko mjeseci pune ruke posla, a kada za godinu ili dvije na red dođu novi upisi u Matičnu knjigu rođenih, kao „plod“ pomenutog povećanog broja sklopljenih brakova, nadamo se da će i „bijela kuga“ u Gračanici biti prošlost. (Print-tel br. 35)

30. 8. 2008.

Proklanjavanje džamije u Džakulama

Izgradnja ovog dosta velikog i lijepog vjerskog objekta počela je 2006. godine na inicijativu džematlija tog džemata. Kako je na skupu izvijestio predsjednik Odbo-



ra z aizgradnju te džamije Avdo ef. Hodžić, u objekat je uloženo 550.000 KM, od čega su najvećim dijelom prikupljena sredstva džemtalija Džakula. Ovoj svečanosti prisustvovalo je nekoliko hiljada vjernika gračaničke i susjednih općina. Svečanost su uveličali i visoki gosti vjerskog i političkog života općine i Tuzlanskog kantona, kao i izaslanik Reis-ul-uleme Mustafe ef. Cerića. Ključeve novosagrađene džamije izaslaniku reis-ul-uleme Mirsadu ef. Muratoviću uručio je Abdulaziz Ametbegović, a čast da prvi otključa džamiju pripala je predsjedniku Građevinskog odbora Sabitu Hodžiću.

5. 9. 2008.

Gračanica: „Asfaltirana“ i Seljanuša

Asfaltirana dionica duga je 1320 metara, širine između 3,5 i 4 metra, a koštala je oko 200 hiljada KM. Sredstva su zajednički obezbijedili općina Gračanica i mještani Seljanuše. Uz skromnu svečanost, sim-

boličnim presijecanjem vrpce put su na upotrebu predali predsjednik Vijeća MZ Gračanica Sead Čaušević i općinski načelnik Nusret Helić, a potom je uslijedilo narodno veselje.

5. 9. 2008.

Mevludin Spahić, član Planinarskog društva “Zefir” Gračanica, u jednoj ekspediciji osvojio tri alpska planinska vrha, prvi Gračanlija na Mon Blanu

Riječ je o međunarodnoj ekspediciji, „Alpe 2008“, koju je organizovalo Planinarsko društvo “Pobeda” iz Beograda, (od 3.–19. 8. 2008.). Spahić je bio u skupini od 54 alpinista iz Srbije, Makedonije, Crne Gore, Bugarske i Slovenije s kojom se „uspenjao“ (osvojio) tri vrha i to: Grintovac (2558 m.n.v., u Sloveniji), Breithorn (4165 m.n.v u Švicarskoj) i Mont Blanc (4808.m.n.v) u Francuskoj. “Iako imam na svom ‘rabošu’ mnogo više i atraktivnije vrhove, kao što je recimo Ararat, ipak mi je osvajanje Mon Blana najdraže u karijeri, jer Alpi su ipak Alpi, izazov za svakog pravog planinara”, izjavio je po povratku u Mevludin Spahić, inače poznati gračanički prozaista i pjesnik.

28. 8. 2008.

Rezultati za historiju gračaničkog sporta

Prošle sedmice gračanički sportisti zabilježili su nekoliko izuzetnih rezultata, od kojih će neki biti zlatnim slovima upisani u historiji gračaničkog sporta; **Adnan Hadžić** (Biciklistički klub Gračanica), dvanaestogodišnjak iz Sokola, u kategoriji mladih kadeta na prvenstvu BiH u brdskoj vožnji, na stazi „Bukva“ u Gračanici zauzeo 3. mjesto, a na stazi u Sanjskom Mostu drugo. Potom je, 31. avgusta, u Zenici na veoma zahtjevnoj brdskoj stazi „Smetovi“ u Kup utrci za šampionat BiH osvojio prvo mjesto, kao prvi gračanički

biciklista u historiji. Stručnjaci su jedno-glasni u ocjeni da se radi o izvanserijskom talentu, u koji vrijedi ulagati. **Edina Selimović**, članica ženskog odbojkaškog kluba „Gračanica“, već je treću sezonu stalna članica juniorske reprezentacije naše zemlje i na dva nastupa na Balkanijadama u Srbiji (Obrenovac) i BiH (Tuzla), okitila se sa dvije medalje. Iz Srbije se Edina vratila sa srebrenom, a iz Tuzle sa bronzanom medaljom, što je svrstava u najuspješnije poslijeratne sportiste našeg grada i općine; **Šahovski klub Gračanica** je na državnom šampionatu u Neumu, u Drugoj šahovskoj ligi Federacije BiH, zauzeo drugo mjesto na tablici, bez ijednog poraza i plasirao se u šahovsku „A-1“ ligu Federacije BiH, što je takođe najveći uspjeh u historiji gračaničkog šaha.

21. 9. 2008.

„Plamingo“: zapažen nastup na 20. sajmu „Automechanika“ u Frankfurtu

Na ovom vodećem međunarodnom sajmu auto-industrije, koji je održan od 16. do 20. septembra, nastupilo je 4.600 izlagača iz 80 zemalja svijeta. Za proizvodni program „Plaminga“ tokom sajma interes su pokazali poslovni ljudi iz vodećih kompanija automobilske industrije, među kojima Mercedes McLaren“ iz Londona, „AGT“ automobil Europa iz Belgije, norveški Turbo servis, General Motors (predstavnik za Njemačku, Predstavnici firme „Audi“, Auto-klasteri iz Belgije, Holandije, Francuske i mnogi drugi.

U toku sajma „Plamingo“ je sklopio nekoliko konkretnih izvoznih poslovnih aranžmana.

25. 9. 2008.

Posljednja redovna sjednica Općinskog vijeća ovog saziva

Nakon usvajanja dnevnog reda, vijećnici su bez veće rasprave usvojili Odluku o

utvrđivanju naknada za uređenje građevinskog zemljišta i pogodnost građevinskog zemljišta za bespravno izgrađene objekte i Odluku o promjeni statusa nepokretnosti u opštoj upotrebi. Potom su upoznati sa Izvještajem o obavljenoj reviziji finansijskih izvještaja općine Gračanica za prošlu godinu i o utrošku budžetske rezerve za prvo polugodište ove godine. Opća ocjena revizora je da nije bilo ozbiljnijih kršenja propisa i nenamjenskog trošenja budžetskih sredstava u naznačenom periodu. Uočeni nedostaci i sugestije dobro će doći u postupku donošenja Budžeta, te praćenja njegove realizacije u narednom periodu.

Nakon redovne održana je i svečana sjednica Općinskog vijeća na kojoj se prisutnima obratio predsjedavajući Općinskog vijeća Hasan Fehratović i između ostalog rekao: „Dobro se sjećam kritika na početku rada ovog vijeća i skeptika koji su tvrdili da Vijeće ne može raditi u ovakvoj političkoj strukturi i da će doći do njegovog raspada. Hvala Bogu Općinsko vijeće privodi evo svoj mandat kraju i sudeći prema trenutnoj situaciji na području Općine i interes za ulazak u Općinsko vijeće, mogu reći da smo Vijeće u protekle četiri godine vratili tamo gdje mu je mjesto.“ Potom je iznio malu statistiku Općinskog vijeća: održano su 42 redovne, 3 tematske, te 23 svečane sjednice, usvojeno 115 odluka, prihvaćeno 58 izvještaja i 87 informacija, obavljene rasprave o 20 nacrtu zakona itd. Strateške odluke vijeća, prema ocjeni predsjedavajućeg Fehratovića su: Odluka o izgradnji putne infrastrukture iz zaduženja općine, Odluka o toplifikaciji grada Gračanice, Odluka o nastavku izgradnje sportske dvorane na Bazenu (PKSC), odluke o usvajanju i provođenju regulacionih planova „Centar“ i Poslovna zona.

26. 9. 2008.

Otvoren „Robot“: Nakon BINGA, Interexa, Konzuma, Etne, Tehno-Maketa i FIS-a, Gračanica je dobila još jedan veliki prodajni centar

Radi se o novoizgrađenom objektu na lokaciji nekadašnjeg motela „Gračanica“, devetom po redu iz porodice „Robota“ u Bosni i Hercegovini koji raspolaže sa 6 hiljada kvadratnih metara prodajnog i magacinskog prostora. Na tom prostoru potrošačima se nudi, kako je istakla direktorica firme Sajma Hodžić, čak 20 hiljada raznih proizvoda, izloženih na odjelima tekstila, bijele i smeđe tehnike, namještaja, sanitarija i opreme za kupatilo, vrtnog programa, kozmetike, a tu su i igraonice i kafe bar. U tom objektu posao dobiva stotinjak radnika iz Gračanice i njene okoline. Direktorica Hodžić je na svečanosti otvaranja objekta kojoj je prisustvovalo oko 1.500 budućih potrošača istakla i sljedeće: „Naš najvažniji cilj jeste da kupac iz naših objekata izađe zadovoljan i mi ćemo se uvijek truditi da usluga bude bolja, asortiman veći, a kupac zadovoljniji.“ Potom se skupu obratio općinski načelnik Nusret Helić i, između ostalog, rekao: „Ovo je uistinu lijep događaj u našoj, moram to reći, neveseloj stvarnosti ‘začinjenoj’ predizbornom halabukom, kojim mi šaljemo jednu poruku, poruku optimizma da se u našoj Gračanici pozitivno misli i

dobro radi.“ Da je lokalna vlast uvijek na usluzi poduzetnicima načelnik Helić pokazao je i konkretnim primjerom: „Evo u ovoj koverti se nalazi upotrebna dozvola za ovaj objekat i svi ostali ‘papiri’, a izdala ih je općinska administracija za samo 48 sati od podnošenja zahtjeva. To još jednom pokazuje da smo mi sredina u kojoj vlada povoljno orazračje za razvoj poduzetništva i biznisa.“

5. 10. 2008.

Lokalni izbori: bez većih problema

Za ovogodišnje izbore na gračaničkoj općini upisano je 38.555 građana s pravom glasa. Na izbore je od toga izašlo 24.147 birača (glasanje za Općinsko vijeće) i 24.151 (glasanje za općinskog načelnika) ili 62,6%, što je izuzetno dobar procent. (izlazak birača u Tuzli bio je 45,53%, Živinicama 61%, Lukavcu 54,5% itd.). Za glasanje su bila otvorena 54 biračka mjesta, od čega 14 u Gračanici. Odziv birača iznad općinskog prosjeka (dakle, preko 62%) bio je u sljedećim mjesnim zajednicama: Stjepan Polje, P. Brdo, Buk, Trnovci, Rašljeva, Piskavica, Škahovica i Malešići, Soko, Babići, G. Doborovci i Vranovići. Odziv birača ispod općinskog prosjeka bio je u mjesnim zajednicama D. Orahovica, Miričina, Pribava, D. Lohinja, Gračanica, G. Orahovica, Lukavica i Doborovci.

Nezvanični rezultati za izbor načelnika bili su poznati nepuna dva sata nakon zatvaranja birališta. Negdje iza 22.00 sati Muhamed Ibrahimović, kandidat SDA, telefonom je čestitao pobjedu svome rivalu iz SDP Nusretu Heliću.

8. 10 2008.

Toplifikacija Gračanice: izvršeno probno potpaljivanje prvog kotla—počela takozvana „topla proba“.

Vatru su potpalili općinski načelnik Nusret Helić, predstavnik firme SEGES



Enes Hamidović i glavni koordinator projekta mr. Omer Hamzić. Nakon toga održana je kratka press konferencija, na kojoj je općinski načelnik Nusret Helić, vidno uzbuđen, između ostalog izjavio i ovo: "Vjerujte, draži mi je ovaj današnji čin nego drugi načelnički mandat koji sam osvojio prije tri dana. San u koji mnogi nisu vjerovali postaje stvarnost..." Toplotnu energiju uskoro će dobiti komitenti u Industrijskoj zoni, a među njima prvu podstanicu dobio je Tržni centar „Robot“.

9. 10. 2008.

Sajam u Zenici: zapažen nastup gračaničkih privrednika

Grand prix Ruža ZEPS-a za izlagača koji je svojim nastupom obilježio 15. generalni bh. sajam ZEPS 2008. dodijeljena je Udruženju poslodavaca i samostalnih privrednika iz Gračanice, koji su nastupili zajedno, u posebnoj hali na sajmištu Kamberovića polje. Nagradu za proizvod dobio je preduzeće Kovan iz Gračanice.

15. 10 2008.

„Kovan“ – metalna industrija Gračanica: visoko priznanje ZEPS-a

Među pet dobitnika priznanja za proizvod, po izboru posebnog žirija sajma, ove godine našao se i gračanički „Kovan“ – za proizvod „Toplovodni kotao na bio masu“, koji je izazvao izuzetno veliki interes na ovoj sajamskoj priredbi. Riječ je o „Eko line“ toplovodnim kotlovima, koji po svojim tehničkim karakteristikama u potpunosti zadovoljavaju evropske standarde, a pristupačnom cijenom i efikasnim servisom potrebe kupaca. „Eko line“ kotlovske peći ovog proizvođača obezbjeđuju ekološko, jednostavno i ekonomično zagrijavanje poslovnih i stambenih objekata. Koriste specijalne sisteme koji poboljšavaju sagorijevanje bio mase (peleta), čime se

smanjuje ispuštanje štetnih gasova.

22. 10. 2008.

Toplifikacija Gračanice: „Plamingo“ – prvi potrošač priključen na toplovod

To je firma koja od prvog dana podržava Projekat toplifikacije Gračanice u kojem vidi, kako reče direktor firme Samir Ćurić, ne samo svoj ekonomski interes, već odlučan zajednički napor na ekološkoj zaštiti i čistoći naše Gračanice.

30. 10. 2008.

Počeli radovi na podizanju biste Josipu Brozu Titu u centralnom parku u Gračanici

Kao što je i najavilo, bistu podiže lokalno Udruženje „Josip Broz Tito“ i Udruženje antifašista i boraca NOR-a uz podršku poštovalaca imena i djela Josipa Broza Tita i osporavanje onih koji smatraju da tom i takvom obilježju nije mjesto u centru Gračanice. To je tema mnogih kafanskih i kuloarskih priča i ogovaranja, ali i oštre polemike na web stranici gračanica.net. Jedni spočitavaju lokalnoj vlasti da nije smjela dozvoliti podizanje biste Josipu Brozu prije izgradnje centralnog spomen-obilježja poginulim borcima i šehidima u ratu 2002. – 2005., drugi su mišljenja da to dvoje nikako ne treba dovoditi u vezu, treći najavljuju podizanje biste kontroverznom komandantu legije i ustaške 25. bojne Ibrahimu Pjaniću, četvrti se prave nezainteresovani... I dok traje neprimjerno politiziranje i nepotrebno trošenje energije oko uistinu nepotrebnog obilježja, organizatori i nosioci ovog posla najavljuju svečano otkrivanje biste za Dan državnosti 25. novembra ove godine. Iako se grad oko toga podijelio u dva tabora, zvaničnih reakcija ni iz političkih stranaka, niti iz organske vlasti još uvijek nema.